

He Kanikau no Haunani Kay Trask (A Tribute to Haunani-Kay Trask)

Kaleikoa Ka'eo and Kahele Dukelow

He aloha nui, e ka heke mana wahine
Ua hala ʻē aku ʻoe,
i ke ala hoʻi ʻole mai
A hoʻi paha i ke ala hele
polikua a Papa
ʻO Papa huli honua, ʻo Papa huli lani
ʻO Papa nui hānau moku
Nalo akula i ke ehu kakahiaka
Hökū ʻōlino loa o ke ao kanaka
Ka lei lanakila a ka lāhui
A Hawaiʻi loa a e hiʻipoi nei
A noho aʻela i ke kapu o nā lani,
ʻOlapa ka uila, kuʻi hekili
Hōʻailona kapu o nā alii
Anuanu mai nei ke aloha
Kolokolonahe ana i ka houpo,
Aloha e Noenoe Uakea o Hāna
Kulāiwi hanohano o nā kūpuna
He moʻopuna hāaheo na Piʻilani
Ua lani hāʻahaʻa o Mauiakama
He kamalei no ke anu o Nā Koʻolau
I kōkōʻōlua a ka ua Kuaʻōe
Koa hoʻoheno o ka makani Ulumano
Ka manomano o ke aloha ʻaina
Aloha ka Ua Kuahine o Mānoa
Ia wahi pipiʻo a ke ānuenuēi laila ʻoe lā e hoʻonaʻuao aku ai
Hāliʻi ana e Kahaukani

Lilo i makuahine 'imi ná'auao
A alaka'i maika'i ma kahi kula uli ē
I kumu no ka ua loku me ka lā mehana
No ke anu a me ko'éko'é lā
Hānai 'ia a mā'ona i ka 'ike kālai'āina
Ke ha'alo'u nei, a hū a'ela ka uē
Hāinu ihola i ka wai ola a ma'ema'e
Ke kahe nei a helele'i ihola
Ka waimaka aloha e kulukulu nei
He Kanikau lā he aloha ē
E ke Kumu nui ē, e ke Kumu nui ē
E ke Kumu 'ao o mākou nā Hawai'i
Pau pū me nā haumāna puni ke ao nei
E paio mau me nā leo mana piha
A hiki i ke aloha 'āina hope loa
Ua minamina lā e minamina
Paumako lā e paumako hō'i
Lele ke Kumu nui lā,
lele ke Kumu nui ē.